

04 JUL 1996

TAHNIAH AGONG UNTUK VENEZUELA

KUALA LUMPUR, 4 Julai (Bernama) -- Yang di-Pertuan Agong Tuanku Ja'afar hari ini mengirim perutusan tahniah kepada Presiden Republik Venezuela Dr Rafael Caldera sempena ulang tahun ke-185 kemerdekaan negara itu esok.

Menurut kenyataan Wisma Putra, Seri Paduka berharap di bawah pimpinan Caldera, Venezuela akan terus menikmati keamanan, kestabilan dan kemakmuran.

Perdana Menteri Datuk Seri Dr Mahathir Mohamad dalam perutusannya kepada Caldera mengucapkan tahniah dan maju jaya kepada kemakmuran dan pembangunan Venezuela.

Beliau percaya terdapat peluang-peluang untuk meningkatkan hubungan baik antara kedua-dua negara dan berharap kerjasama ekonomi dapat dipertingkatkan.

Menteri Luar Datuk Abdullah Ahmad Badawi dalam perutusan beliau kepada rakan sejawatannya Dr Miguel Angel Burelli Rivas berkata Malaysia dan Venezuela telah menikmati hubungan dua hala yang baik dan telah bekerjasama dengan rapat mengenai isu-isu antarabangsa yang berkepentingan bersama terutamanya dalam menggalakkan kerjasama antara negara-negara membangun.

-- BERNAMA

HT WAT AHH